



Juullip ulloriai

Foto: Bendt Kristiansen, Ilulissat

# Meeqqat juulikkunni aalakkuttoqaraangat eqqugaanerpaasartut

Kultur · 20. december 2017 · 07:05 af [Mads Pedersen](#)

**Imigassamik atornerluineq decembarimi ersarinnerpaasarpog, decembarillu 23-at tassaasarpog politiit ulapinnerpaaffiat. Angajoqqaat juulikkunni aalakkutillaraangata meeqqat eqqugaanerpaasartut Politiit Red Barnetillu oqaatigaat.**

Juulliarraq tasaanerarneqartarpoq meeqqat juulliat, meeqqalli ilaannut taamaangilaq. Angerlarsimaffinni decembarip 23-ani aalakkuttoqarnera nakuusertoqarneralu meerarpassuit misigisarpaat.



Politiit juulikkunni aggersarneqaraangamik marlunnik pissuteqakkajuttartog, Nuummi politiini pigaartuunerup, Lina Davidsenip, KNR-imut oqaluttuaraa.

- Politiit ulapinnerpaaffigisartagaat decembarip 23-ani aallartittarpoq 24-at alu ullaava ilanngullugu ulapaarfiusarluni. Orniguffigisagut tassaakkajuttarput nakuusernerit angerlarsimaffinnilu eqqissiviilliornerit, Lina Davidsen oqaluttuarpoq.

- Alianartua tassaavoq angerlarsimaffinni eqqissiviilliorortoqaraanga ilaqutariit meerartallik takussaasarmata. Ajoraluartumillu meeqqat eqqugaanerpaasarput.

Lina Davidsenip aamma oqaluttuaraa angerlarsimaffinni eqqissiviilliortoqarsimatillugu inunnik

isumaginnittoqarfik attavigineqartartoq, imalu ajortigisinnaasartoq allaat meeqqat angerlarsimaffimminnit peerneqarallartariaqartarlutik.

- Tupinnangitsumik meeqqat sunnertisimaartarput aliasullutillu.

## Decembarimi atornerluineq ersarinnerulertartoq

Imigassamik atornerluinerup juullikkunni ersarinnerulertarnera Red Barnetimi siulittaasup, Jonna Ketwap, oqariartuutigaa.

- Amerlanerit juullikkunni nuannersumik ilaqutariittullu katerisimaarnertalimmik juullisiortarput.

Ilaqutariinnili arlalinni imigassartortoqarpallaarnera pissutaalluni assortuuttoqarlunilu eqqissiviillioortoqartarpoq. Taamaattoqartarnera meeqqat ersinerannik toqqissisimanginnerannillu kinguneqartarpoq, tassami angajoqqaat naatsorsoruminaallisarmata, Jonna Ketwa oqarpoq, nangillunilu;

- Imigassamik atornerluineq juulleriaratornerani ersarinnerulertarpoq, tassami pinngitsuuisinnaangitsut aalakoornissamat juullikkut patsisissatut atortaramikku.

Sooq decembarip 23-ani taama aalakkutsigisoqartarnera Lina Davidsenip, politiineersup, erseqqissumik akiuminaatsippaa. Taamaattoq pitsaanngitsunik ileqqoqarneq juullinngitsiarneranilu akissarsisarneq pissutaaqataasinnaasutut isigai. Red Barnet aamma taama isumaqarpoq:

- Juullinngitsiarnerani akissarsititsisarneq akunnakusoortortaqarpoq - ingammik meeqqanut imigassanut aningaasartuuteqangaatsiartartunik angajoqqaalinnut. Juullikkunni nuannaarnissaraluaq pakatsinermik juullikkunnilu tujorminartunik eqqaamasanik taarserneqartutullusooq ittarmat.

- Juulli tassaasussaagalarpoq meeqqat nuannataarfissaat. Piffissani taamaattuni qanilaarneq, nuannersunik misigisaqarneq katerisimaarnerlu meeqqat pisariaqartippaat, Red Barnetimi siulittaasooq ulluinnarni tarnip pissusaanik ilisimasalittut sulisoq, Jonna Ketwa, oqarpoq.



**Nyhedsbrev** - Nyheder fra KNR på mail

Morgennyheder  Eftermiddagsnyheder  Breaking news

Email adresse

Postnummer

TILMELD